

## VERMISCHTES

### «Mit dä Schtimm vo dä Chile»

#### Jubiläumsgedicht in Mundart zum Fest «250 Jahre Kirche Steckborn» am Sonntag, 9. September

Vor 250 Jahr hät me mich erbaue  
zum Lüüt i mir taufe, verabschiede oder traue  
verschiedeni Konfessione händ ihri Gottesdiensch abghalte  
einigi dänked ökumenisch, anderi gschpalte

min Turm isch fröhner uf dä Oschtsite gsii  
aber das isch scho 180 Jahr verbii  
vill Mänsche sind scho uf mini Plattform cho  
für das hät jede Bsuecher 176 Tritt in Agriff gno

vo mim 50 Meter höche Turm gseh'n ich sehr wiit  
ich mach mir verschiedeni Gedanke i so langer Ziit  
vo mim Platz här gseh ich au paar anderi Chile  
das ich so vill Gschpänli ha, isch am Mänsch sin Wille

fliessige Händ händ mich erbaue  
ich bi nöd usem Bode gwachse dur Gottvertraue  
die Handwerker händ wüchlich öppis chöne  
däne mag ich mis schöne Usgseh gönne

mini 2300 Kilo-Glogge händs in Turm ufe zoge  
das ohni Chrane, das isch nöd gloge  
min Schtandort find ich wunderbar  
wieti Seesicht bis is Usland, das isch rar

Veränderige rund um mich z'Schteckborn  
oder ä chli' wieter äne rund um Horn  
vo mim Platz chan ich s'Meische gseh  
und zwar uf beidne Site vom Undersee

was dä Mänsch so macht, hät mich scho öppemal verwundert  
i dä vergangene 2.5 Jahrhundert  
d'Mänsche händ verschiedeni Religione  
jedi Gruppe tuet ihren Vorteil luut betone

au d'Grenze Mitti See seg nöd für nüt  
änedra wohnt schinbar ganz anderi Lüüt  
i mim innere ghör ich jede Ton  
au vo däm, wo uf dä Kanzle redet für sin Lohn

scho mänge Pfarrer hät mit mir sin Lohn verdient  
vill gueti Lüüt händ au scho gratis dient  
bsuecht mich än Proteschtant oder än Katholik  
ich interessier mich für gar kei Politik

ich beurteil jede Mänsch für sich  
wo är dezue ghört isch mir glich  
dä Friedhof liet grad näbedzue  
öppe eine findet erscht dötte sini Rue

jedem Bsuecher wo öppis für dä Friede tuet  
gaht's schlussendlich sälber guet  
vo mir sind das ganz eifachi Wort  
normalerwies wird meh prediget a däm Ort

uf mis Jubiläumsjahr freu ich mich, so frisch renoviert  
und freu mich uf jede Bsuecher, wo mir gratuliert